

Banjir kilat: Kerajaan cadang naik taraf kolam takungan

KUALA LUMPUR 22 Mac- Kerajaan Pusat bercadang menaik taraf Kolam Takungan Berembang di sini bagi menampung intensiti taburan hujan sekali gus mengatasi masalah banjir kilat di ibu negara.

Menteri Wilayah Persekutuan, Datuk Seri Tengku Adnan Tengku Mansor berkata, projek tersebut merupakan usaha sama Dewan Bandaraya Kuala Lumpur (DBKL) dan Jabatan Pengairan dan Saliran (JPS) bagi memastikan air hujan berlebihan tidak melimpah dari kolam tersebut.

“Turut dicadangkan pembinaan kolam takungan banjir di Sungai Bunus berdekatan Universiti Teknologi Malaysia (UTM) dan Terowong SMART 2 sebagai usaha mengawal banjir kilat,” katanya.

Beliau berkata demikian ketika diminta mengulas mengenai insiden banjir kilat di beberapa lokasi di ibu kota petang semalam selepas merasmikan Majlis Pecah Tanah dan Permohonan Rumah Mampu Milik Wilayah Persekutuan (Rumawip) Residensi Rampai 2 di sini hari ini.

Yang turut hadir Ahli Parlimen Setiawangsa, Datuk Ahmad Fauzi Zahari; Ketua Setiausaha Kementerian Wilayah Persekutu-

an, Datuk Seri Adnan Md. Ikshan; Timbalan Yang Dipertua Dewan Negara, Senator Datuk Seri Abdul Halim Abd. Samad; Pengerusi CRSC Group, Datuk Seri Lawrence Low Wui Keong dan Pengarah Urusan Pancaran Nilai (M) Sdn. Bhd., Lim Yew Jin.

Menurut Tengku Adnan, kejadian tersebut berpunca daripada limpahan air Sungai Bunus, Sungai Gombak dan Sungai Klang ekoran taburan hujan lebat luar biasa.

Sementara itu, beliau menggesa orang ramai tidak mudah terpedaya dengan fitnah pembangkang berhubung perancangan menggagalkan projek-projek kerajaan.

“Pembangkang cemburu dan sering berdoa supaya segala

usaha kerajaan akan gagal, namun apa yang berlaku perancangan kerajaan masih berjalan lancar,” katanya.

Dalam pada itu, pembinaan kediaman Residensi Rampai 2 akan bermula Jun ini dan dijangka siap pada 2021.

Projek tersebut merupakan kerjasama DBKL dan Pancaran Nilai Sdn. Bhd., yang akan membina sebanyak 308 unit pangapuri berkeluasan 243.84 meter persegi dilengkapi tiga bilik tidur dan dua bilik air.



**TENGGU ADNAN
TENGKU MANSOR**



**CADANGAN
menaik taraf
Kolam Takungan
Berembang
mampu mengatasi
masalah banjir
kilat di sekitar ibu
kota. - GAMBAR
HIASAN**